

# Radunanza bainvisitada e divertenta da la Rezia Bassa

## Uniun da diaspora chapescha d'attrair e tegnair commembers

DA CLAUDIA CADRUVI / ANR

■ **Sco ina gronda famiglia han ils Rumantschs da la Rezia Bassa salvà lur radunanza generala la dumengia passada. L'uniun è ordvart viva e la glista d'activitads pulit lunga. Suentar in curs da cuschinar spaisas grischunas vegn uss purschì in curs cun spaisas internazionalas. Intgins paucs plazs èn anc libers.** En quest'uniun sa sentan ins immediat bainvegni ed entant ch'autras uniuns fan radunanzas magari in pau sigtas tutga quella da l'Uniun rumantscha Rezia Bassa tar ils termins ch'ils commembers nodan en mintg'cas en l'agenda – betg mo perquai ch'i dat ina buna tschaina. Passa tschuncanta personas ha il president *Rinaldo Caduff* beneventà la sonda passada en l'ustaria Kiesfang a Vilters. «Bliers presidents da vischnanca fis-san leds sch'els avessan tants che vegnan a la radunanza communal», ha il president manegjà.

### Lia refusa dumonda

En ses parairi dal 2018 exprima Caduff la trumpada che la Lia Rumantscha a Cuira ha refusà la dumonda da sustegn da la Rezia Bassa. La Lia communitgeschia adina puspè quant impurtanta che la diaspora saja, scriva il president: «Cura ch'i va dentant per sustegn èn quels da Cuira ualti ruassaivels e prendan massa peda per ina resposta. Igl è natiralmain era pussaivel che noss'uniun n'è betg uschè interessanta per els e na vala perquai betg la paina da sustegnair, tge san ins.» Tuttina sa sprovia l'uniun da vinavant porscher in program plain variasiun, empermetta il president en ses parairi che la radunanza ha approvà cun applaus.

### Losch sin il chor

Loscha dastga l'uniun er esser sin sia tradiziun cantica rumantscha. Dapi passa trent'onns posseda l'uniun in chor che dumbra da preschent passa 42 chantadurs e chantadurs.

Il chor è creschì pulit ils ultims onns ed il dirigent *Eugen Casanova* di ch'i saja reussì svelto dad integrar cun agid da madritschas e padrins ils novs chantadurs.

Il chor chanta mintg'onn en il bogh da Ragaz, plinavant tutgan concerts en chasas da vegls, a festas da chant u per ils giubilars da l'uniun tar il program. Per l'onn actual planisescha Casanova da prender er intginas chanzuns englaisas u talianas en il repertori «per mussar che nus essan poliglots».

### Revisur cun umor

Durant la radunanza ha il president procurà cun sgnoccas u pitschnas remartgas per inqual risada. Er il revisur *Lucas Caviezel* chapescha da divertir. Entant ch'authers revisurs fan curtas e legian giu a moda sitga lur rapports zuglia il revisur da la Rezia Bassa ses parairi bunamain en rima e fa gizzar las ureglias.

La radunanza approvescha il quint dal 2018 cun entradas da passa 6000 francs ed expensas d'enturn 3600 francs, uschia che la facultad munta il davos da l'onn a rundund 5000 francs.

### Chalender pulpi

Quest onn planisescha la Rezia Bassa plirs arranschaments, sco per exempel ina visita en l'Engiadina a chaschun dal

giubileum da 100 onns Lia Rumantscha, ina viandada sin il Launaberg, ina visita tar RTR, il lotto obligat etc. Ils 26 da mars cumenza il segund curs da cuschinar. Il cassier e cuschinier *Retus Spescha* mussa questa giada co far tratgas spagnolas, talianas, norvegiasas, ungaraisas ed asiatas. Il curs cuzza quatter sairas e tgi che vulesc anc s'annunziar chatta las indicaziuns necessarias sin [www.reziabassa.ch](http://www.reziabassa.ch) sut il chavazzin arranschaments.

Cun chaud applaus engrazia la radunanza a plirs commembers fidaivels che fan gia part bliers onns da l'uniun, per exempel il dirigent *Eugen Casanova* u *Venanzi Casanova* ch'ha presidià plirs decennis l'Uniun romantscha da Sargans e contuorn sco che l'uniun aveva num fin avant dus onns.



Han il gaudi – ils participants dal curs da cuschinar.